

CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY
APR 15 1952

04

T5295 /714

小承朝陽公集卷之七

初春對雪

初春對雪

初春對雪

初春對雪

初春對雪

初春對雪

初春對雪

初春對雪

初春對雪

初春對雪

初春對雪

初春對雪

初春對雪

初春對雪

初春對雪

初春對雪

唐丞相曲江張先生文集卷之七

勅書 制書

勅吐蕃贊普書

勅吐蕃贊普書

勅金城公主書

勅吐蕃贊普書

勅金城公主書

勅吐蕃贊普書

勅張待賓書

勅牛仙客書

勅張待賓書

勅護密國王書

勅護密國王書

勅識匿國王書

勅勃律國王書

勅諸國王書

勅罽賓國王書

勅日本國王書



勅西南蠻首領書

勅靜州首領書

勅蒙歸義書

勅蠻首領書

勅安南首領書

南郊赦書

東封赦書

后土赦書

籍田赦書

勅吐蕃贊普書

皇帝問贊普得七月一日信所言陰承本奏請不擬與彼和將兵馬大入者至如和與不和事皆由朕自斷何人輒敢奏聞何兵即敢擅入所結親好不是近年文成公主已來亦重疊矣中間或絕或繼終是舊

好存焉惟道此有讒臣不知彼專構造亦須自覺豈可推過至如兵馬邊備彼與此同既見彼處加兵豈此總無備矣疑自彼起不可相尤近日築城不出疆界邊頭有要隨事脩營何所致疑以此爲語如彼頻歲亦築數城若不惡心何故嚴備固是邊境常事不足爲言忽此相尤深所未達彼蕃必其自守此兵終不妄行所立盟約更知何用鬼神知意不必多言秋氣已冷贊普及平章事並平安好遣書指不多及

勅吐蕃贊普書

皇帝問贊普此使前至之日具知彼意竇元禮中間

所去亦已備論且親以舅甥之國申以婚姻之好義
非不重心豈合疑頃歲以來加之盟約此又不信其
如之何至如境上蠻夷元是衆物來不可拒去不可
追前書已言想所知也而每來信使皆以爲詞或去
越界築城或稱將兵抄掠且蠻旣背彼伊自築城城
在蠻中人即隨地所以侵竊亦是群蠻皆在荒遐豈
關處分而歸過於我無乃甚乎邊境小人不識大體
此旣未免彼亦有之間構旣行猜嫌互起朕近已知
此替普亦須察之勿取浮言虧我大信以絕兩國之
好甚善甚善所有諸事皆具前書公主所請與人官

及內人品第即當續有處分春晚漸熱替普及平章
事並平安好今有少物別具委曲至宜領取遣書指
不多及

勅金城公主書

勅金城公主歲月流易忽復經年言念遠情何能已
已比者通好信使數來知彼所宜善足爲慰國家大
計以義斷恩離別嬰心固當自抑仍善須和順使歡
好如初所請授官及內人品第旣久在彼誠亦可矜
即當續有處分宗玄禮衰疾近不能起賈混之緣此
未得獨行待其稍瘳亦即遣去今有少信物至宜領

取春晚公主已下並平安好遣書指不多及

勅吐蕃贊普書

皇帝問贊普朕與彼國既是舊親近年已來又加盟約如此結固仍有猜嫌明知異域之心亦難可保比者所有信使惟知怨此相違自料國家何負於彼至於突騎施葛爾醜虜頃年恃我為援幸至今日而敢辜恩朕未即誅之待其惡積贊普越界與其婚姻前者以意向道即云尋已告絕朕亦委信以為必然今乃定婚如初惡黨可見又莽布支西出朕具知之令竇元禮往彼問以何故又道別緣他事為此追還其

人實將兵西向擬行攻取前後詐妄言與事違驗在目前得不嘆恨夫人之所以為貴者以其有信有禮國之所以能強亦云惟信與義若言不可信義不可親雖在匹夫尚多耻愧何況君長能無情乎彼突厥施人面獸心偏僻荒遠見利則背與親實難贊普昔朕宿恩共彼相厚應非長策可熟思之又比來觀彼事意有殊往日惟任計數以此為能今與突騎施和親密相結託陰有贊助而傍作好人如此潛謀亦非遠計所欲為患不過邊庭且邊鄙之於中國如毫毛之在身耳以彼戎狄侵我毫毛雖實無多何須有損

朕所以殷勤和好欲靜邊人君國之心不能忘也亦與贊普累代舊親幸無大故不宜輕絕今邊鎮兵馬不可不防彼亦有之與此無別既不先舉自足知心從前所言豈有虛也秋晚稍冷贊普及平章事首領百姓並平安好遣書指不多及

勅金城公主書

勅金城公主數有來使聞彼安寧差慰遙心想所知也柔順之道既以夙成終始用心貴於無失惟此而已餘不足言所附物並依領具有還荅并更附少信物別有委曲至宜領取秋冷念比何似遣書指不多

及

勅吐蕃贊普書

皇帝問吐蕃贊普比亦覺彼事勢有異略加防備仍未益兵今得安西表來莽布支率衆已到今見侵軼軍鎮并踐暴屯苗先知彼有異謀猶未自將至此者且莽布支西出朕先之前令問其行由得報自緣別事今乃爲賊負心如何安西諸軍去此萬里倉卒遇敵何暇奏裁既彼交侵必應拒鬪倘有傷損可無相尤軍城鎮守之人不可束手就死事由彼起深所咨嗟且累代舊親復新有盟約彼既欺負天地違犯

鬼神如此用心更知何道一往邊頭所備只緣慮有非常今果如言防乃不錯突騎施異方禽獸不可以大道論之贊普與其越境相親只慮野心難得但試相結又後如何於朕已然義則合絕但爲誓約在近親好又深彼雖背恩豈我尤效先今莽問欲盡舊情必定爲惡別爲之所一昨遣內常侍劉思賢送公主封物并每年國信物見已臨路適會表來思賢此行量其在道遲緩今故令劉思賢判官劉明子先行具宣往意秋冷贊普公主及平章事並平安好遣書指不多及

勅西州都督張待賓書

勅天山軍使西州刺史張待賓吐蕃背約入我西鎮觀其動衆是不徒然必與突騎施連謀表裏相應或恐賊心多計諸處散下鐵關干術四鎮咽喉倘爲賊所守事乃交切已勅蓋嘉運與卿計會簡練驍雄於要處出兵以爲聲援仍遠令探候知其有無自外臨時皆委卿量事秋冷卿及將士並平安好遣書指不多及

勅河西節度副大使牛仙客書

勅河西節度副大使太僕卿攝御史大夫牛仙客突

騎施連歲犯邊凶惡如此若不威服祇長寇讎自夏
及今連歲不散踈勒雖解邊城見侵雖無如我何亦
爲邊所患終須有計以挫凶謀卿可於河西諸軍州
揀練驍雄五千人卽赴安西受王斛斯分部朕當發
遣十八年安西應替五千四百八十人與彼相續足
得成師若無暫勞何從息甲且此賊狂悖不論信義
直肆凶毒其意已然不此加兵以圖撲滅使其驕暴
豈有寧時已勅蓋嘉運與王斛斯審量事宜臨時爲
計旣爲卿探訪所管亦宜隨要指麾無有別勅發三
萬人此但聲援而已可大張威勢遠使震懾又恐安

西資用之乏卿可於涼府將二十萬段物往安西令
隨事支擬及克宴賜朕則續支送涼州

云

云

勅天仙軍使張待賓書

勅天仙軍使張待賓近知賊下燒此安然卽去竟無
斥候來不預知如此防邊無乃踈闊此一分頭抄掠
計其數不至多向若烽鋪稍明復與北庭計會相與
來擊賊可無遺且邊鎮統軍俱受朝委共防患害可
異一家况在絕漠尤宜相援已勅蓋嘉運訖可與之
籌宜凶黨復來固須有預冬中甚寒卿及將士益平
安好遣書指不多及

勅護密國王書

勅護密國王真擅朕知卿忠赤能保國境所以前加禮命用叶蕃情卿感此殊恩盡力外禦聞有凶寇能伸遠績以義動衆雖弱必強豈獨人心亦有神助甚用嘉歎不可忘也冬末甚寒卿及將士比並平安好遣書指不多及

勅護密國王書

勅護密國王真擅發畲積惡自取滅亡想所知之不復煩述卿此者雖受冊立緣此未得還蕃彼既伏辜固無隔閼卿宣揚國命慰撫遠人保我西陲長守誠

節突騎施凶逆慮其凶掠卿宜善討勿令不覺其來巴西商胡比遭發畲劫掠道路遂斷遠近呼嗟卿宜還國必須防禁蕃中事意遠路難聞可量彼權宜便與王斛斯計會夏末甚熱卿及首領並平安好遣書指不多及

勅識匿國王書

勅識匿國王烏訥沒莫賀咄卿此與護密相爲唇齒而發畲凶狡劫殺商胡罪不容誅走投異域朕知其惡積改立真擅遽聞却來還占本國卿等讎疾頑暴相率誅之累歲逋逃一朝剪滅永言忠義深所嗟稱

今授卿將軍賜物二百疋錦袍金鈿帶七事已下節級者有衣物各宜領取夏末甚熱卿及百姓並平安好遣書指不多及

勅敦律國王書

勅敦律國王蘇沒謹忙得王斛斯表卿所與斛斯書知卿忠赤輸誠國家外賊相誘執志無二又聞被賊侵寇頗亦艱虞能自支持且得退散并有殺獲朕用嘉之卿兄麻來兮及首領已下各量與官賞具如別勅今賜物三百疋銀盃銀盤各一衣一副并金鈿帶七事至宜領取夏中甚熱卿及首領並平安好遣

書指不多及

勅諸國王葉護城使等書

勅諸國王葉護城使等突騎施不道連年作寇使我邊鎮常以爲虞諸處攻圍所在堅守能伺其隙各有誅夷比卿等赤誠臨事效節使妖不勝德氛祲自消遙料凶謀還慮再下且賊衆烏合疲於重來勞則心離久必有隙卿等常須有預以逸待之一二年間奇功可立富貴之舉彼賊是資忠烈之懷此心可度今各賜卿衣一副聊慰勤誠所有勲勞已令叙定當續有處分想亦知之春暄卿及將士並平安好遣書指

不多及

勅罽賓國王書

勅罽賓國王得四鎮節度使王斛斯所翻卿表具知好意然事在絕域不可預圖卿若誠心任彼量度事遂之日必有重賞朕每於遠國未常有所食言想亦知之勿致疑也秋初尚熱卿及首領並平安好遣書指不多及

勅日本國王書

勅日本國王王明樂羨御德彼禮義之國神靈所扶滄溟往來未常爲患不知去歲何負幽明丹墀真人

廣成等入朝東歸初出江口雲霧斗暗所向迷方俄遭惡風諸船飄蕩其後一船在越州界即真人廣成尋已發歸計當至國一船飄入南海即朝臣名代艱虞備至性命僅存名代未發之間又得廣州表奏朝臣廣成等飄至林邑國旣在異國言語不通並被劫掠或殺或賣言念災患所不忍聞然則林邑諸國比常朝貢朕已勅安南都護令宣勅告示見在者令其送來待至之日當存撫發遣又一船不知所在永用疚懷或已達彼蕃有來人可具奏此等災變良不可測卿等忠信則爾何負神明而使彼行人罹其凶害

想卿聞此當用驚嗟然天壤悠悠各有命也中冬甚寒卿及百姓並平安好今朝臣名代還一一口具遣書指不多及

勅西南蠻大首領蒙歸義書

勅西南蠻大帥特進蒙歸義及諸酋首領等卿近在邊境不比諸蕃率種歸誠累代如此况卿等更效忠赤朕甚知之頃者諸酋之中或有撻貳相率自討惡黨悉除即日蕃中應且安帖然則地臨外境亦須有預人無遠慮必有近憂卿可思之豈虛語也所有蕃中事意使者具知之比秋涼卿及百姓並平安好遣書指不多及

勅拓靜州首領書

勅拓靜等州部落昨王承訓去緣當州百姓有相扇動故令宣旨告示彼人如卿拓靜等州種落各異本自寧帖何復為言此者採訪使處置或未得所朕既知之已有處分卿等祖父忠赤輸誠國家既是子孫久襲冠帶各守先業足得坦然何所憂虞而云驚懼宜各遞相告語勿使更然夏中已熱首領百姓並平安好遣書指不多及

勅西南蠻大首領蒙歸義書

勅蒙歸義吐蕃於蠻擬行報復又雋州鹽井本屬國
家中間被其內侵近日始復收得卿彼蕃落亦應共
知吐蕃惟利是貪數論鹽井比有信使頻以爲詞今
知其將兵擬侵蠻落無擬取鹽井事似不虛國家與
之通和未常有惡今旣如此不可不防卿即與達奚
守珪部落團練候其有動方可出兵必無事蹤亦不
得先舉雋州相去道里稍遙若有驚急復須爲援並
委卿與達奚守珪計會無失事宜卿於國盡誠在邊
爲捍委寄得所朕復何憂秋中漸涼卿及首領百姓
並平安好今故令內給事王承訓往一一口具遣書
指不多及

勅蠻首領鐸羅望書

勅故姚州管內大酋長那傍時嫡孫將軍鐸羅望卿
之先祖輸忠奉國遽聞徂逝深愴于懷言念邊人必
籍撫綏又逼蕃界兼資鎮遏卿宜繼承先業以副朕
心故遣宿衛首領王白于姚州都督達奚守珪計會
就彼吊尉便授卿襲浪穹州刺史并賜綾彩三百疋
至宜領取秋中已涼卿及首領已下並平安好遣書
指不多及

勅安南首領爨仁哲書

勅安南首領歸州刺史爨仁哲潘州刺史潘明威獠
子首領阿迪和蠻大鬼主孟谷悞姚州首領左威衛
將軍爨彥微將軍昆州刺史爨嗣紹黎州刺史爨曾
戎州首領右監門衛大將軍南州刺史爨歸王南寧
州司馬威州刺史都大鬼主爨崇道昇麻縣令孟耽
卿等雖在僻遠各有部落俱屬國家並識王化比者
時有背叛似是生梗及其審察亦有事由或都府不
平處置有失或朋讐相嫌經營損害既無控告自不
安寧兵戈相防亦不足深恠也然則旣漸風化亦當
頗革蠻俗有須陳請何不奏聞蕃中事宜可具言也

今故令掖庭令安道訓往來宣問並令口具有穩便
可一一奏聞秋中已涼卿及百姓並平安好遣書指
不多及

制書

南郊赦書

門下朕獲主三靈于今一紀聽政中昃每不敢康觀
書一夜將求諸道而頃年已來每思至理或遠人勿
率或嗣歲不登淳朴未還揚厲斯在爲人上而慙德
奉天明以畏威故祝史正辭必期於陳信郊丘備禮
將俟於昇平今宗廟降靈克開厥後乾坤交泰保合

太和麟鳳龜龍玄符黃瑞之祉蠻夷戎狄梯山航海
之琛莫不日月以出道路相屬顧惟不德當茲休運
欽若昭報疇咨故實所以今年獻春恭祠后土季秋
吉日追崇九廟採必先於曾經稽肆類於虞典爰因
長至欽謁上玄告受命之元符昭嚴配之成績大典
云備至誠克展諸侯駿奔來於穆之相百神受職率
咸秩之文六變已陳三獻斯畢蓋春秋之大事莫先
乎祀王者之盛禮莫重於郊柴燎克終感慶罔極豈
予一人之福亦爾萬邦之賴宜因咸和之際俾承厚
下之澤可大赦天下嗚呼君臣一體休戚共焉朕欽

承天命躬傳大寶至懃累祖餘業得一之符亦由群
公舊勳不二之力永言繫賴其敢忘之自武德已來
實封功臣知政宰輔有身無人故而亡官實封子孫
淪屈者所由勛責具狀以聞存者可籌其官榮逝者
當錄其胤嗣使幽明同慶知有令辰

東封赦書

門下朕聞天監唯后后克奉天既合德以受命亦推
功而復始厥初作者也三若道洽跡著時至符出
皆用事于介丘并靈之靈人神之望蓋有以塞之
皇王之序固可得而言之也接統千歲承光五葉惟

祖宗之德在人惟天地之靈作主往有內難幽贊而
集大勳間無外虞守成而續舊服未嘗不乾乾終日
思與公卿大夫上下一心幸及至運引我烈聖其庶
乎馨香今九有入章群氓樂業時必敬授而不奪物
亦順成而無天懋建皇極幸致大和聚乃幽遐率由
咸被戎狄不軌唯文告而來定鱗鳳已臻將覺悟而
在藪以故凡百執事亟言大封頌惟不德初欲勿議
伏以先聖儲祉與天同功荷傳符以在今敢侑神而
無報大節斯在朕何讓焉遂奉遵高祖太宗之業憲
章乾符之典時邁東土柴告岱宗精意上達眇蠶來

應信宿行事雲物呈祥登降之禮斯畢嚴配之誠獲
展百神群望莫不懷柔四方諸侯莫不來慶斯事天
下之介福邦家之耿光也無窮之休祉豈獨在予非
常之惠澤宜其逮下可大赦天下朕躬陟天門宿齋
日觀時屬嚴冬雪候初夜風寒朕因露立祈恩誓欲
代人當咎俯仰之際頓首霜醴魚獻之二衣變同韶景
誠荷上天垂祐亦賴靈山吐祥詩云無德不報宜封
太山神爲天齊王禮秩加三公一等宜令所管崇飾
祠廟環山十里禁其採樵給近山二十戶復以奉神
祠率土之內賜脯七日正於村坊宴樂不得聚斂煩

勞其節文有未霑及者所司比類奏聞其封祀有數
處行事者從一處叙赦書日行五百里主者施行

后土赦書

門下昔者巡狩所至柴瘞斯者蓋取誠享以遵告類
朕恭承祖宗之烈獲主神祇之祀夙夜祇畏不敢荒
寧故勒兵朔陲先展義於汾社廻旆睢上遂有事於
郊壇王者父事天母事地則漢氏祈穀未始正名周
禮降神乃爲徼福而已朕以天命之重予道爲先惟
茲精神在乎敦孝庶蒙福於四海斯永康於兆人是
以率山舊章敬恭明祀嚴配之誠旣展奠獻之禮又
終且春秋之議大事若祀齋祭之福庶品維祺豈獨
在予而共有斯慶可大赦天下

藉田赦書

門下昔者受命爲君體元立極未有不謹於禮而能
見教於人朕其庶乎有懃作者方冊存而可舉舊章
絕而復尋自古所行無一而廢將以上乞靈於宗社
下蒙福於黎元朕茲精誠天實降鑒今嗣歲初吉農
事將起禮有先於耕籍義緣奉於桑盛是所嚴祗敢
不敬事故躬載耒耜親率公卿以先萬姓遂終千畝
謂敦本之爲小何布澤之更深宜有順於發生俾無

偏於行惠可大赦天下宗廟致享務在豐潔禮經公
革必本人情邊豆之薦或未能備物服制之紀或有
所未通宜令禮官學士詳議具奏朕自臨天下二紀
于茲不敢荒寧日加兢業而災眚未弭黎人未康若
有由而然則在予之責有能直言極諫者具以狀聞
每渴賢良無忘鑒寐頃雖虛佇未副旁求其才有王
霸之畧學究天人之際智勇堪將帥之選政能當牧
宰之舉者五品已上清官將軍都督刺史各舉一人
孝悌力田鄉閭推挹者本州長官勘實有才可堪應務
者各以名聞致仕官久歷清資始終稱著年漸衰邁
情有可矜量與改職依前致仕宗子中有才行著聞
比尚沉屈者委宗正勘實奏聞唐元兩營立功官任
折衝並改與郎將郎將改與中郎其亡官失爵量加
收叙五岳四瀆名山大川及自古聖帝明王忠臣良
相並令所在長官以禮致祭赦書有所夫該者所司
比類奏聞亡命山澤挾藏軍器百日不首復罪如初
敢以赦前事相言告者以其罪罪之都城內賜酺三
日布告遐邇咸使知聞

唐丞相曲江張先生文集卷之七終

唐丞相曲江張先生文集卷之八

表狀

復中書侍郎表

進金鏡錄表

荊州謝上表

賀赦表

冊皇太子表

進白鹿表

為王峻謝表

獻寫聖真圖表

為何給事進表

論教皇太子狀

論內勸婦女狀

論東北軍狀

論憂薛王疾狀

論薛王薨狀

請御注經狀

將士刊石紀功

傳授御注經狀

西幸改期請付史館狀

為寧王寫經狀

賀張待賓奏慈捷狀

賀北庭解圍狀

賀奚奚丹離貳狀

賀誅奚賊狀

賀破突厥狀

賀東北累捷狀

賀突厥要重人死狀

賀突厥傷死狀

賀突厥二徵狀

賀破賊狀

賀賊遁走狀

賀雪狀

賀侍講賜衣物狀

賀雨狀

賀晴狀

賀雨狀

賀雪狀

賀祈雨有應狀

賀太陽不虧狀

賀祥雲狀

賀麥登狀

賀進古銅器狀

讓起復中書侍郎同平章事表 并御批

草土臣言伏奉去年十二月十四日制復臣中書侍

郎同平章事者外沮公望內奪私情餘生力微哀怖

殞絕臣誠哀誠懼死罪死罪臣伏以宰相所職贊理

庶事陶冶太和以遂萬物苟非所任有受其殃臣實

單人本無大用况在艱疚觸緒哀迷矧以素所不堪

加之荒塞而軍國事重翼亮誠難臣獨何人謬居此

地退省所有負敗將及雖願感恩匍匐抵命其於塵
玷聖鑑汚辱台衡於國非急於禮虛廢臣比年限役
多闕晨昏疚疚之際遽乖救藥凶諱之日遠隔追攀
而星霜未周冠冕載道是以庭闈昔絕几筵今阻凡
日名教實所深哀伏惟眷情有以永錫况質言非讓
悲歎不文祈天之心惟聖所體實與哀素有次喪紀
獲終俯鑒荒迷乞遂情禮臣無任感絕哀迫之至謹
詣朝堂奉表陳乞以聞臣誠哀誠懼頓首頓首死罪
死罪謹言開元二十二年正月二十七日草土臣張
九齡上表

御批

卿去歲禮闈擢受樞密實關政本將倚爲相頃來升
用是會宿心雖屬家艱已踰年序不有至孝誰能盡
忠若墨練之義不行蒼生之望安在謂此情難奪豈
成命可移比日行在佇卿促轡今旣至止無勞固辭
朕以非常用賢曷云常禮哀訴即宜斷表今日便上
進千秋節金鏡錄表

臣九齡言伏見千秋節日王公已下悉以金寶鏡進
獻誠貴尚之尤也臣愚以謂明鏡所以鑑形者也有
妍蚩則見之於外往事所以鑑心者也有善惡則省

之於內故皇帝鏡銘云以鏡自照見形容以人自照見吉凶又古人云前事之不遠後事之元龜元龜亦猶鏡也伏惟開元神武皇帝陛下聖德之至動與天合本已全於道體固不假於事鑑然覆載廣大無所不包聖道冲虛有來皆應臣敢緣此義謹於生辰節上事鑑十章分爲五卷名曰千秋金鏡錄雖聞見褊淺所擇不深至於區區效愚其庶乎萬一不勝悃款之至謹言

荊州謝上表

臣九齡言伏奉四月十四日制授臣荊州大都督府

長史聞命皇怖魂膽飛越即日戒路星夜犇馳屬小道所使多驛馬先少以今月八日至州禮上誠惶誠恐頓首頓首死罪死罪臣不即飲氣取死豈敢輒惜餘命伏念心無黨惡死則似同以此偷生猶希聖察臣往年按察嶺表便道赴使訪聞周子諒久經推覆遙即奏充判官尋屬臣改官使亦有替其後信安郡王禕奏將朔方驅使便請授官臣以其嶺外勤勞因而奏乞事不敢隱未止涉私然進用非人誠宜得罪但臣特蒙拔擢出自宸衷陛下所用隱微惟臣而已伏思報效竊恃聖恩每於事端無所防避智識雖淺

罄竭則深微誠區區義有所在豈復與此私協以負
累聖鑒臣雖至頑至愚不至於此皇天后土照臣血
誠夙夜煩寃欲辨無路臣聞物有窮者必訴於昊天
人有痛者必呼於父母臣今孤苦不乞哀於聖君豈
蒙惡聲遂銜寃以沒代臣受性愚鈍闇於知人稟命
舛剝與此凶會誠合自死以謝天威所以側息苟存
者臣爲聖朝所用旣極榮寵而一朝至此恐玷明時
在臣微生有若螻蟻身名俱滅誠不足言今釁咎則
然恩禮猶重面目有覩夙夜唯憂戴盆望天豈期上
達又未能宣布聖澤少荅殊私踴躍兢皇動失次第
無任荷懼兢悚之至謹附河西經略判官所部朝義
郎法曹參軍蘇銳奉表陳謝以聞臣誠惶誠恐頓首
頓首死罪死罪謹言

賀赦表

臣言伏奉今月八日制恩春郊展禮惟新布澤臣聞
古之王政雖在方冊將崇舊典必俟聖君伏惟開元
神武皇帝陛下德合天明道高帝載以爲春者發生
之氣氣者含育之本事乃重於歲始禮故親於東郊
振絕代之綱作名王之法布澤行慶昭德順時以合
陰陽之和以乘天地之正凡在品彙莫不昭蘇臣待

罪荆南亦濫承恩賜臣無任欣慶戰荷之至謹因所部送永王俸料官當陽縣主簿陳琇奉表陳賀以聞臣誠歡誠喜頓首頓首死罪死罪謹言

慶冊皇太子表

臣言伏奉今月二日制冊立皇太子者伏以皇太子天實生德睿智夙備爰以吉辰光膺盛典伏惟開元神武皇帝陛下建儲固本體天合聖萬方之心永貞是屬一人之慶大賚斯在臣待罪荆南不獲稱慶闕庭欣躍之誠實百常品無任悚踊慶躍之至謹遣所部宣義郎行枝江縣尉揚崇仙奉表陳賀以聞臣誠

歡誠喜頓首頓首死罪死罪謹言

洪州進白鹿表

臣聞聖法天則至理調於元氣天表聖則嘉瑞託乎群生將以幽替玉澤覺悟生靈知至德之所感如虛響之必應伏惟開元神武皇帝陛下道孚神化體合乾行品物所資太和罔不叶圖諫所載殊祥罔不臻故郡國上言日月相繼臣所部豫章縣某月某日獲白鹿一休氣所集靈質自呈欲效符祉易爲馴狎臣謹按瑞應圖云王者明惠及下則白鹿見又按孝經援神契云王者德至鳥獸則白鹿見蓋鹿者仙壽之

物實爲禎祥之表雖時和歲稔固不假於羽毛而天
意人事誠欲伸於耳目臣不勝感慶之至謹詣某所
奉瑞鹿表進以聞臣誠歡誠喜頓首頓首死罪死罪
謹言

爲兵部尚書王峻謝平章事表

臣言伏奉今月二十九日制授臣兵部尚書同中書
門下三品殊常寵靈妄集疲朽承恩竊喜任重惟憂
臣誠歡誠恐伏以虛受之難魯尺以量其力蒲盈之
過夏載陳其招損臣階緣試吏際會登朝遂得入拜
尚書比天之喉舌出典方鎮爲王之爪牙雖忠烈之

誠心知所竭而績用之美歲久無聞今陛下不以不
能爲光爲寵寘之廟堂之上參以軍國之謀實恐出
是不任鷄翼爲刺退失微臣之守上累陛下之明是
以永夕九飛終朝三省泉谷爲懼冰炭在懷道雖願
於將行位固慙於幸得臣已有別狀具所讓人猶蒙
曲私未寢嚴命方欲俯僂恭命對揚休光磨鈇效於
一割策蹇同於十駕臣誠懼塵台席謬齒國華將何
以允荅鴻私弼諧大化拜命祗惕罔知所爲臣不勝
荷懼之至謹奉表謝以聞臣誠惶誠恐謹言

爲信安王獻聖真圖表

臣言臣一昨扈從西狩岐陽時以有年事因農隙整
六軍之衆脩大田之禮戍卒是訓威武載揚屬草淺
獸肥霜清氣殺詔虞人以即鹿命荊州而起鳥陛下
親御弧矢紆駕林衡曾不合圍取其背者雖有逸群
之狡走險之捷而飛黃騁轡縈紉如組綠沉緹鏞宛
轉若神必命中於前期皆應絃而絕倒其餘變態不
測神妙無窮非臣瞽言所能模狀旣而備獻禽之禮
虔薦寢之誠教人以孝丁自天作則此外效獲畢賜懿
親兼禁羽騎無犯宿麥是行也典禮斯備仁恩允洽
三令惟肅七德以宣魏武何階亦紀功於猛獸周文

差擬將比義於非熊臣忝籍宗枝幸陪鑿輅竊觀神
武冠絕古今以爲載之空言不若圖之繪事向所述
聖今皆寫真雖天顏不違而丹青莫擬徒極愚思庶
好萬一謹一一陳伏深戰汗臣誠惶誠恐謹言

爲何給事進亡父所著書表

臣言臣父某官某乙往歷樞近志勤忠益至於霸王
大畧軍國要務事關興替言涉箴規因著十篇名曰
帝圖秘錄將欲獻納纔加撰次尋屬臣私門殃豐夙
邁閔凶手澤所存心瞿不忍遂未奏御猶在緘滕二
紀及茲遺言將墜誠愚臣不克負荷不揚休烈俾亡

父之業聖代莫傳雖忝掖垣若寘氷谷伏惟陛下聽
政中昃觀書乙夜思上皇而合道恨古人於同時而
臣亡父所論君臣之際必欲驗之行事非真垂於空
文誠宜上感宸衷由沒代而匡輔下藏秘府因聖君
以發明竟未上聞伏增悲懼臣不勝感惕之至謹繕
寫封進以聞謹言

論教皇太子狀

右臣伏以皇太子是天下之本爲國之貳今則睿質
漸長猶在深宮所與近習者未必皆正人端士安於
逸樂久則性成是以古者明王恐其若此雖在赤子

先之以教必使耆儒頌德爲之師保故大戴禮云周
成王在襁褓之中太公爲之太師教之順也周公爲
之大傅傳其德義召公爲之大保保其身體是故成
王能聖周道用康秦始皇使趙高傳其太子胡亥因
教之以獄所習者非斬剗人則夷人之三族也胡亥
即位秦氏以亡則明人之性情莫不由習若近正人
聞正事雖欲爲惡固已不忍若親近細人不聞教諭
縱欲行善猶未知所適此必然也胡越之以生則聲
同長則語異蓋聲者天然語者所習習於胡則胡習
於越則越故知成於所習不可不慎臣伏願詳擇典

故微用名賢執經勸學朝夕從事俾皇太子得於所
言天下幸甚謹奉狀以聞謹狀

論內勘別宅婦女事狀

右件婦女事緣卑職綏綏兩縣檢括有所阿容即願宣
付憲司糾摘其罪今便收補入內別加推逐道路有
云何急於此若在外勘當慮以相寬其餘法獄豈皆
應就內始可以社其請託方益威嚴便是法不肅而
吏不懼其弊尤重於別宅者也昔漢丞相府尚不按
吏誠以務在尊崇體不可失况天子中禁而有此名
丞尉極微所緣至小固不足以塵黷聖聽雖在內曹

外議切切未爲得所即有聞知不敢不奏謹狀

論東北軍未可輕動狀

右高力士宣奉勅張守珪所進送突厥生口具問知
委曲故令劉思賢去者臣等伏以北虜凶狡誠亦難
保其心然陛下以恩澤懷柔歲月已久使彼豺武頓
改頑暴以事觀察信然不虛何者昨李佺使迴虜亦
具云東下中間或言難信至今果如所說即是輸誠
於國未有他詐且契丹等翻覆或往或來今其東討
雖未稟命在於夷狄亦不可責於常理若因而屠之
亦便除患陛下先有聖料以爲如此臣等常竊思之

固非所及今其來也若契丹等偶勝北虜勢衰因而乘之滅其大半審料必取始可決行事若不然而軍將妄動徒結大隙亦以不信爲國生患莫甚於此臣伏以在邊諸將苟利一軍便即行之以邀榮賞不思遠計誠是大失今劉思賢往望將降書處分守珪必爲遠圖無得妄動切納諸將使知聖心縱虜庭聞之尤彰天澤未審可否謹錄狀奏聞

薛王有疾上憂變容爰請宣付史館

并御批

右臣等伏見邠王守禮等表并答制以薛王蔡有疾聖情軫慮宿昔之間容髮遂變又尋繹攷倦假寢通

神因獲異方頓解危憊誠陛下友愛之至冠於皇王急難之情達於神道所以諸王陳請願書竹帛然猶讓此歸美推而不居聖德謙冲固難名於廣大臣子之志敢忘義於昭宣况臣等近侍軒墀倍百恒品望以邠王等狀宣付史館謹錄狀奏聞伏聽勅旨

御批

凡曰兄弟豈同他人况有疾疢自成憂迫不辭容髮致改且喜神心助人雖用靈方猶未痊平願茲德薄實懷多慮所請宣示良或未然

薛王薨上損膳請復膳狀

并御批

右未經旬時慘恤相次聖情友愛之至屬此天倫之
戚伏聞寢膳有改乎常臣等下情不安夙夜惶灼伏
願抑損恩命冲用道心以承宗社之重以慰臣庶之
望天下幸甚臣等不勝倍迫恒情之至謹奉狀以聞
死罪謹奏

御批

兄弟之喪人倫所重哀廢飲食禮訓有變雖欲自抑
有如此情

請御注道德經及疏施行狀 并御批

右臣等伏以至道無名常善救物所以鎮彼澆競登

諸福壽而古今殊論穿鑿多門徒廣津梁何階闔闕
伏奉恩勅賜臣等於集賢院與諸學士奉觀御注道
經及疏本天旨玄遠聖義發明詞約而理豐文省而
事愜上足以播玄元之至化下足以闡來代之宗門
非陛下道極帝先勤宣祖業何能廻日月之晷度鑿
乾坤之戶牖使盲者反視聾者聳聽蒙蔽頓祛沉迷
有違允在率土實多慶賚無任忻戴忭躍之至請宣
付所司施行

御批

先聖說經激時立教文理一貫悟之不遠後來注解

岐路增多既失本真動生疑誤朕恭承餘烈思有發
明推校諸家因之詳釋庶童蒙是訓亦委曲其詞慮
有未周故遍示積學竟無損益便請宣行朕之不才
其失旨於先帝卿等虛美豈不畏於後生循環此情
未知所適可廣示朝廷有能正朕之失者具為條件
錄姓名以聞當別加重賞

請東北將吏刊石紀功德狀 并御批

右奚及契丹尤近邊鄙侵軼是慮式遏成勞臣庶常
情惟欲防禦所謂長策無出此者陛下獨斷宸襟高
奪群議以為頓兵塞下轉粟邊軍曠日持久役無寧

歲若不因利乘便一舉遂平使遷善者自新為惡者
就戮事若不爾無息我人且令大兵臨之凶徒必潰
不出此歲當並成擒臣等初奉聖謀高深未測及聞
凱捷畧候不差而兩蕃遺噍莫不稽顙緣邊戍奪咸
以返耕臥鼓滅烽誠自此始斯皆陛下睿謀先定神
武非常觀變早於未萌必取預於無象伏以成功不
宰君人所以為量有美不宣臣子所以成罪臣雖蒙
瞽安敢無言既預聞始謀又幸見成事豈可使天功
虛往而日用不知竹帛相傳復紀何事請具狀宣付
史館垂示將來仍請將吏等刊石勒頌以紀功德臣

某等不勝區區忭躍之至謹奉狀以聞謹奏

御批

事有難易因圖可否小蕃皆誕惡貫已盈人神棄之
指期可滅今之滅定偶會夙心記以史官銘之樂石
頗矜功伐不願爲之伯戲前請朕已不納卿等苦論
載用多媿使桓山之頌復在茲乎

請御注經內外傳授狀并御批

右臣等今日於九齡處伏見集賢院奉賀御注前件
經墨勅批荅兼九齡說睿思幽贊玄闕洞闢微言奧
旨廓然昭暢臣等近識暗於大道粗聞九齡此傳便

若已有所得欣戴感悅誠不克任伏惟陛下天縱無
方有來斯應萬殊一貫三教同歸伏望降出御本許
內外傳授則冀明精切之重昏納群迷於正覺朝聞
夕死尚不足怪顧此輕生於焉何幸臣等不勝忭躍
之至

御批

此經宗旨先離諸相解說者衆證以真空僧徒固請
欲以弘教心有所得輒復疏之今請頒行慮無所荅

西幸改期請宣付史館狀并御批

右臣今日面奉進止西幸有日般運已去仍聞京畿

百姓猶有未安倘來歲非熟下人無向朕雖至彼復
有何情欲延期至來冬待看穀麥卿等商度以為何
似臣等具奏洛陽城闕雖曰皇都至於宮苑之間制
度本狹然風土氣候不甚宜人陛下以萬姓為心萬
姓以陛下為命億兆所繫誠在聖躬聖躬若安何顧
小小陛下遂當寧動色再降德音苟利於人朕何顧
惜發言惻隱感動神祇臣等幸聞至言不覺承睫聖
恩愛育遂及於此又勅臣等商量進來者湛恩至德
焉可使朝臣不知聖君鴻名不可令史官無述臣望
宣聖旨改用來年十月辛酉京仍望具將本狀徧示
朝列并宣付史官等臣不勝踴躍之至

御批

初聞三輔之間今歲善熟朕緣陵寢誠欲西行然積
虛累年乍得小稔即又聚食所慮重難倘夏麥不登
未免匱乏百姓不足朕孰與安所以再三疚懷欲去
不忍至於宮苑所樂氣候非宜苟得人安終不以此
為念卿可宣前旨更俟後期所請徧示朝列及宣付
史館亦屬煩也任卿等自商量

上為寧王寫一切經請宣付史館狀并御批

右臣奉勅今日於安國觀行香伏見天恩為寧王及

故惠宣代國金仙公主共寫一切道經四本伏以睿
恩友愛情深天屬生成之德無隔存亡利益之資方
弘道要諸經筆繕景福云集稱贊茲日功用有成教
義是先誠所感慶臣無任欣戴之至望宣付史館謹
奉狀以聞謹奏

御批

道由先宗欽承餘慶所祈福力憑以真經歸謹至誠
匪存名教所請者依

賀張待賓奏剋捷狀

右高力士宣示臣等張待賓表臣等前因奏事親承
聖旨懸料數月當有捷書及此使至皆如賸略但狂
胡背誕圍逼軍州凶力固已困窮邊城一無所損臣
等伏料此賊早是破傷大衆遠來踰月乃去馬羸則
多死人苦則計生本是烏糴之徒足徵破亡之漸此
皆皇威遠壘氛祲半銷豈伊邊人所能自保臣等幸
忝樞近承奉聖謀邊捷有符不勝慶悅謹奉狀陳賀
以聞仍望宣付史館謹奏

御批

狂賊遠來無能支久果自奔北不擾邊人豈朕獨見
之明固在大臣良策所謂宣付史館者依

賀北庭解圍仍有殺獲狀并御批

右蓋嘉運奏北庭解圍仍有殺獲蘇祿背德敢此讐
天盡驅犬羊來犯軍鎮雖肆凶毒欲逞其心而邊兵
無遺鏃之費狂賊有輿尸之禍此皆陛下聖武將士
恭行遠必叶謀動無遺策能令氛祲坐自廓清臣等
忝奉密謀屢承獻捷踴躍稱慶倍百恒情謹奉狀陳
賀以聞謹奏

御批

醜虜遠方我之有待奔亡相次天實誅之鎮撫四夷
故有賢相權宜一策何獨朕躬所賀知

賀奚契丹並自離貳廓清有期狀并御批

右適高力士宣示臣等張守珪奏契丹及奚並自離
貳兼安祿山復有殺獲賊數將盡觸緒猜携邊鎮勤
兵伺隙而動誅剪有日廓清可期此皆天威遠臨逋
逃自滅臣等不勝慶躍之至

御批

比未窮巢穴有慎徃兵果自猜携人神所棄折衝樽
俎遙可圖之所賀知

賀誅奚賊可突干狀并御批

右高力士宣示張守珪所上逆賊契丹屈烈及可突

于等首級此等惡稔喪敗將及故天誘其衷既降又
貳而感義之士惡其翻覆背恩之賊既已誅鋤幽障
廓清華夷俱靜計其餘嚙永無動搖陛下邊任先擇
聖謀獨斷克稟成命樹此戎功且知河朔無轉輸之
勞林胡爲賦稅之地臣等忝在樞近預聞遠績捷書
之至喜倍恒情謹奉狀陳賀以聞謹奏

御批

用兵之上者脩政於廟堂折衝千里之外此之謂也
小寇遠降復爲翻動邊軍除剪有國常刑朕方事籍
田而今獻捷當鑄劍戟以爲農器也

賀破突厥狀并御批

右張守珪表奏突厥四萬騎前月二十五日至能訖
離山契丹涅禮等前後斬獲俘馘數十萬突厥可汗
棄甲逃亡奚主李歸國及平盧軍將等追犇逐北計
日殲滅更聞奏者伏以突厥新立輕事用兵彼之威
衆在于一舉又兩蕃與其結隙交構未深在於邊隅
猶軫天筭陛下料其終始指授規模知其舉種盡來
本自無策勞師襲遠必合成擒使蕃騎先鋒漢軍堅
壁坐觀成敗自戰蠻夷今契丹纔交突厥已破計其
奔北必至喪亡脫身獲全亦舉衆皆棄北虜震懾從

此氣衰東胡保邊永不携貳寬佹罷柝自此可期斯
皆聖德遠覃皇威遐振事無遺策舉不失圖臣忝跡
樞近親承睿略忭躍之至倍百怕情謹奏狀陳賀以
聞謹奏

御批

兩蕃歸我因用御邊北虜猖狂欲有親率何則馳騁
之騎突厥頗強弓矢之功契丹稱勁彼強也歷遠已
弊此勁也襲近而摧勢自不敵况違天意廟堂良算
亭障稜威故合而有成豈朕之獨斷所賀知

賀東北累捷狀

并御批

右今日劉思賢至奉宣聖旨垂示臣等破賊所由兼
見守珪表奏具承契丹累捷伏以聖武所加制勝者
無失天威不抗犯順者自亡突厥負衆背恩窮凶遠
襲兩蕃懷德誓死如歸三軍奉國從命如指遂使一
戰便尅已聞殺傷無笑慟哭而奔則知主將必死且
蠻夷相伐我則不勞疆場有虞義亦奚失固知無愆
信於漠北有大造於燕鄯此實獨斷神謀事皆有預
萬全之策未靜邊隅薄伐之師匪勞中夏尤在黎庶
孰不欣躍臣等忝預樞近倍百怕情無任慶悅之至

御批

東歸兩蕃不難令言此制強虜且知威信自相攻伐
稍警邊陲屢有奔亡非無逆順朕之早預故亦常圖
今乃歸功得無同體

賀依聖料赤山北無賊及突厥要重人死狀

信安郡王禧承王忠副驚固牒云赤山有賊
右先得前件牒云九月三日奚探見賊無數前三日
臣等面奉聖旨料此必安祿山所將之兵奚疑是賊
便有此牒也臣等當時又奏突厥舉國大來微有輸
失便去竊料此意恐其有謀陛下又云必應彼有要
重人死所以即去今日幽州節度判官監察御史張

曉至云今月十一日從幽州發來赤山元自無賊奚
所見者正是安祿山下兵馬又云契丹有蕃落人走
來云突厥之兵馬平章事第一人死所以狼狽即去
在路每日於帳衙前哭此並聖心懸照有如目擊臣
等親奉睿筭及此符同萬里無差不勝驚喜無任踴
躍之至仍望宣付史館

御批

朕臨御有年更事多矣天人之際先意後合此亦賊
意可量非朕謀之必中將有可紀任付史館

賀突厥小可汗必是優死狀

右牛仙童宣勅送前件契丹令問委曲者臣等借問
突厥退散所由其伊吐于被擒將隨五日因夜却走
迴每日實見突厥諸將皆於衙帳前哭及整正面是
實據此必是小可汗傷死若其不然不合如此審觀
伊吐于情狀亦即不敢妄言必其不虛乃是天敗比
其歸至本處固應更有餘殃醜虜破亡必自此始也
陛下聖德無遠妖沴自銷不勞師徒已清朔漠臣等
獲奉廟筭不勝抃躍之至

賀聖料突厥必有亡徵其兆今見狀

右林招隱宣勅示臣等張守珪云契丹婦女屈將從
突厥出來知可汗死是實又云黃頭突厥與默啜突
厥爭言氣兵馬欲鬪驚軍屈將然得走來者參驗前
後從突厥來者說事多同况此婦人尤爲指實死旣
非謬天實誅之且諸蕃之中北虜爲桀不待征戰而
自取殲夷此誠天助有道坐清妖祲陛下嘗有聖料
者知其必有亡徵今云兵馬自爭其兆已見佇聽其
敗但只納降亭障息兵將自此始不勝欣慶之至

賀蓋嘉運破賊狀 并御批

右高力士宣奉勅示臣等王尚客奏狀知蓋嘉運至
突厥施店密城逢賊便鬪多有殺獲且凶黨大衆見

在邊城方擬經春圖爲邊患忽聞嘉運北入復有破傷必其驚忙當有携散皆是聖略先定萬里懸同尚客所言合符前旨臣等不勝慶躍之至

御批

方隅暨謗乃圖其事不出意外且有殺傷雖復嘯聚邊城故應知難而退出臣叅佐何獨朕躬所賀知

賀賊蘇祿遁走狀并御批

右高力士宣勅示臣等曹待仙奏狀知蘇祿遁走入山出界者四鎮懸遠北被侵逼將士用命雖有誅鋤凶徒尚多日有抄掠兵疲矢盡爲弊亦深今自奔亡

誠是震懼聖威無遠氛沴坐銷又北庭救兵當時廻旆不費軍廩事且無憂吐蕃縱實西行蘇祿不得相應其敗可必又無可憂邊等且寧不勝慶慰謹奉狀陳賀以聞謹奏

御批

朕以信撫遠蕃故當順以歸命去順爲惡天何容之力屈計窮果自奔散卿等料其後事亦以當然所賀知

賀雪狀并御批

右伏以至德惟勤親耕以勸大禮云畢勞酒加歡聖

感天從豐年雪應始降澤於千畝將有盈於萬箱臣等忝陪近侍載深慶躍無任悅豫之至謹奉狀陳賀以聞謹奏

御批

籍田勸農勞酒成禮此時降雪神人以和是賴合臣致茲嘉應

賀侍講編賜衣物狀 并御批

右高力士宣稱陛下親講讀毛詩編賜侍講陳希烈三品兼衣物等伏以睿思玄通超然物表俯臨天下必樹風化既弘儒教考覈詩人爰託師資親行講讀

章句初畢賞錫有加明主用心孰不欲勸臣等謬承任遇實愧經通聖業彌深微誠何補方思敦學以助明時無任悅豫之至

御批

漢家用儒倚以爲相卿等輔佐朕亦論思侍講說詩用符正道旣至匡益特加章授是先敦獎應會謀猷因斯行講引進經術也所賀知

賀雨狀 并御批

右伏以自春降澤粟麥已滋首夏再旬時雨稍晚陛下念深萬姓恩覃庶獄將有事山川用達精意德音

纔發其霖滂沱此誠聖感必通天應如荅臣等忝居
近侍倍百怙情無任抃躍之至謹奉狀陳賀以聞謹
奏

御批

過月不雨農事或信是用責躬兼令省獄卿即同體
共達乃誠天且不違穀麥皆遂若事關政令動必合
符積久冤抑亦宜踈理宜成朕懷也所賀知

賀雨晴狀并御批

右今月十日高力士宣聖旨以霖雨方滯有害稼穡
之憂將親禱上陽三日內不坐精意朝發而重陰夕

霽乃數日已來遂致開朗誰謂天遠其應甚速遂得
麥秋有望蚕事且登則知至人無心與天地合契神
功潛運豈陰陽不測伏惟陛下明德自廣兢業載懷
所致休徵必加謙慎天聖相合福致羣生日用不知
年和在此臣等無能翊佐徒忝近密每有大猷承奉
不暇無任欣戴慶躍之至

御批

雨以救旱忽至秋霖所慮室農彌深罪已明靈盼饗
遂與開霽實因誠至非謂德先時麥旣登百穀有望
亦卿等同體之效

賀雨狀并御批

右畿輔之間秋來少雨聖心有軫稼穡惟憂德至于
天慶自嘉節實有神應旋降甘雨使將枯之苗有同
於再熟已息之望不意於萬人臣有限不獲當時稱
慶無任悚踴之至

御批

時愆膏雨至于節日以此之故初無宴私雖導所請
憂樂相半樂通和氣憂亦爲陰因茲霈然若以誠應
方收晚歲有同再熟與卿同慰也

賀雪狀并御批

右伏以自冬少雪粟麥不滋歲律向終農候方近陛
下黎庶在念憂濟常深至心精誠天意昭感孰云玄
遠不日有應遂得盈尺告祥動植霈洽豐年有望即
事可期旣表非常之祥員倍不任之喜不勝抃躍之
至

御批

歲律方窮久無雨雪頃者信宿落而復收朕用責躬
天實降鑒皓然竟夕將遍寰瀛固在卿等寬和所致
也

賀祈雨有應狀并御批

右臣一昨面奉恩旨緣秋稼有望時雨暫愆念及黎
元見于頰色方躬自祈請誠勤夙夜上靈昭鑒嘉瑞
必臻昨日申酉之間雲物果應初含五色正覆於壇
場未及終宵更灑於城闕遂使炎埃宿潤雲暑暫清
實冀膚寸之資畢致普天之澤臣等多昧徒仰於成
造蒼生何幸每及於聖私無任欣戴忭躍之至仍望
宣付史館

御批

朕每念元元無忘夙夜頃來少雨是用精祈所見徵
祥果成其應豈朕之德天實爲之今則滂沱與卿等

同慰請付史館者依

賀太陽不虧狀并御批

右今月朔太史奏太陽不虧據諸家曆皆蝕十分已
上仍帶蝕出者今日日出百司瞻仰光景無虧臣伏
以日月之行值交必蝕筭數先定理無推移今朝之
辰應蝕不蝕陛下聞日有變齋戒精誠外寬刑政內
廣仁惠聖德日慎災祥自弭若無表應何謂大明臣
等不勝感慶之至

御批

一昨有司奏太陽當蝕云交分亦繫休咎朕之薄

德是用責躬應蝕不蝕且符至願昔漢家日蝕之變則舉賢良招直諫蓋思補過以名其咎也曷若勤於未兆預以圖之招諫登賢以先天意當與卿等夙夜爲心所請付史館者依

賀祥雲見狀并御批

右臣等伏見道門威儀司馬秀表稱今月十日夜陛下親臨同明殿道場爲宗廟蒼生祈福有祥雲見伏以聖德以精至動天天意以眇嚮符聖其感甚速其應豈遠陛下聖敬之深勤恤所至虛心如答神道何言自表休斯以介景福生人大賴天下幸甚臣等奉

居近侍義百恒情謹奉狀陳賀以聞

御批

朕欽籍玄風緬懷道力上資宗廟下浸元元俾在潛通乃至昭覩愧畏相屬曷用當之願記史臣以彰隆鑒豈朕所宜讓也所請者依

賀麥登狀并御批

右今日高力士宣示臣等皇太子表以嘉麥有成陛下躬執勞事率先兆庶皇太子已下繼美聖功臣聞勤於稼穡必有來麩之慶著在春秋則非他穀之比伏惟陛下致敬宗廟屬念黎元表郊順時則千畝在

御禁園測濶則萬萬皆豐况云立訓天人降尊農務
上靈昭德已爾瑞日增輝當暑不疲則有祥雲自覆
是彰敦本之化式旌造物之功人謠在茲天意可鑒
且禹之盡力堯實用心史策叢談帝玉爲範未有休
徵神應若斯之盛者也以今况古千載未聞請付史
官天下幸甚臣等叨榮近侍倍百恒情無任感戴忭
躍之至

御批

朕親耕千畝卿等佐之謂之勤農期於盡力故園苑
種麥別殿築場訓子勸人因之表奏染成薦薦寢是契
夙心雲日告休易致昭感欲書諸史策卿實與百仕
斟酌事宜耳

賀衢州進古銅器表

右伏見衢州所進瑞魚銘等神物壞竒形製純古魚
爲龍象旣彰受命之元銘作久文更表錫年之永河
圖舊事無以加之臣叶贊休明屢承福應忝惟拜慶
倍百恒情伏望宣付史官傳之不朽無任喜躍之至

唐丞相曲江張先生文集卷之八終

唐丞相曲江張先生文集卷之九

狀并御批

賀御製音義狀

賀論三教狀

賀御注經狀

賀皇太子製碑狀

賀上仙公主靈應狀

賀昭陵徵應狀

謝加章級狀

謝集賢院學士狀

謝知制誥狀

謝兩弟移官狀

謝中書侍郎狀

謝賜麥麵狀

謝賜食狀

謝賜藥狀

謝賜尺詩狀

謝蒙太子書狀

謝兩弟授官狀

謝賜衣物狀

讓賜蕃口狀

觀御製喜雪狀

謝賜喜雪篇狀

讓賜宅狀

讓兩弟授官狀

謝赴祥除狀

進龍池頌狀

謝弟授官狀

賀御製開元文字音義狀

右今日尹鳳祥宣勅旨示臣等聖製開元文字音義三十卷義微旨遠文省理諒表隸以訓今存篆以徵古衆釋大備取證於前脩片言旁通去嫌於翻字信文思之精一學術之明準非聖心之善誘焉降情

於豪素臣等忝居近侍再忭發蒙捧戴之誠實百恒品望令集賢院更寫一本付外流行謹奉狀陳賀以聞謹進

御批

象物成文以行代教傳旨寢遠疑誤增多不制其失孰云端本稍變條流因之指授且以相示竟無可否豈用茲小學而歸美乎餘依所請

賀論三教狀

并御批

右伏奉今日墨制召諸學士及道僧講論三教同異臣聞好尚之論事蹟於萬方至極之宗理歸於一貫

非夫上聖孰探要旨伏惟陛下道契無爲思該玄妙
考六經之同異筌三教之幽蹟將以降照群疑敷化
率土屏浮詞於玉殿緝精義於金門一變儒風再揚
道要凡百庶事罔不知歸臣等幸侍軒墀親承至訓
忭躍之極實倍常情望宣付史館謹奉狀陳賀以聞
謹奏

御批

頃因節日會以萬方略舉三教未暇盡理復茲一集
求之精義不許游詞用伏其心以懲習俗况會三歸
一初分漸頌理皆共貫使以自求之卿等論道廟堂化

原何遠事關風教任付史館

賀御注金剛經狀 并御批

右內侍尹鳳祥宣勅垂示臣等御注金剛經但佛法
宗旨撮在此經人間習傳多所未悟陛下曲垂聖意
敷演微言幽關妙鍵豁然洞達雖臣愚昧本自難曉
伏覽睿旨亦即發明是知日月既出天下普照誠在
此也陛下至德法天平分儒術道已廣其宗僧又不
違其願三教並列萬姓知歸臣等忝奉天文不勝荷
戴無任慶躍之至

御批

不壞之法真常之性實在此經衆爲難說且用稽合
同異踈决源流朕位在國王遠有傳法竟依羣請以
道元元與夫孝經道經三教無闕豈茲秘藏能有探
詳所賀知

賀皇太子製碑狀并御批

右尹鳳祥宣聖旨示臣等皇太子所製王尊師碑文
并壽王書臣等伏以天姿自高更深聖訓文藝英拔
理絕人境臣等周章省覽欣忭載懷兼皇太子文義
高深壽王毫翰灑落朝臣不見竊懼惟蔽善臣等專輒
宜得碑本望明日將示百官了訖續進不勝忭躍之

至

御批

兒子等服勤師訓匪曰才能初爲此文次令繕寫卿
在左右因以呈示曾不箴規乃致推美將簡朝列得
無愧乎

賀上仙公主靈應狀并御批

右臣等伏承今月八日上仙公主靈座有祥風瑞虹
之應爰至啟殯乃知尸解又承特稟清虛薄於茲味
素含真氣自不食鹽泊于遷神更標竒跡伏惟聖系
本於道源妙有所種靈異必降不然則何得幼而能

悟性與非常遠來以時且契於玄運超然而蛻復昇
於丹籙杳冥雖遠髣像如存則知仙路有歸茲念已
釋理絕今古事昭聞見况臣等親侍軒墀幸聞仙解
無任感慰之至伏望宣付史官以昭靈異仍望宣示
百官

御批

道有默仙謂之形解古來既爾今亦將然童幼之年
傷其天促靈變之理乃入玄真且與方外爲心不比
人間結念所謂書諸國史以襲玄元卿亦史官任爲
凡例兼請宣示者並依

賀昭陵徵應狀并御批

右御史中丞徐暉從京便還向臣等說妖賊劉志誠
四日從咸陽北原向南見昭陵山上有黑雲忽起志
誠謂其凶徒云此雲將有暴風若衝頭立恐有破敗
志誠又從軍伍頗解雜占其言未畢飄風果至直衝
行首莫不昏迷衆心驚惶不知所出及至便橋之際
並即走散又見父老云往年權梁山之徒將逞不軌
當時亦有烈風暴雨發自昭陵彼至京城賊還破滅
謹叅往事與今同符者伏以閭閻賊類切敢猖狂而
祖宗威靈亦已玄監昔年感召若命蚩尤今者驅除

更假風伯所以妖氛自殄狡計莫施畧刻之間逃形
無路此皆神功潛運昌曆無窮將俾孫謀用昭聖德
事堪懲惡可以垂後無任慶悅之至仍望宣付史官
并示朝列謹錄奏聞謹奏

御批

先帝應期道光文武之業亦既棄代人畏軒轅之臺
忝以丕承罔不夙夜每有啓悟形於動靜豈茲狂勃
勞我神兵保佑實深戴賀增惕吉之靈應未之前聞
所請宣付史官并示朝列固其宜也並依

謝加章級狀并御批

右伏奉去月三十日勅以臣先任桂州都督借紫金
魚袋前緣改官遂停今更蒙恩特賜任使無效寵服
再加臣雖叨榮伏用戰懼不任悚懼之至謹奉狀陳
謝以聞謹奏

御批

卿早踐中書後牧邊郡因加此級義在優賢今特賜
卿猶前命也所謝知

謝工部侍郎集賢院學士狀并御批

右伏奉今月三日制除臣工部侍郎兼集賢院學士
臣本單族過蒙獎拔入升省閣累忝清資出牧南州

且無成績陛下殊私俯及擢任集賢遠自炎荒忽至
霄漢秘文副掌淺陋無堪遽蒙聖恩反遷華省丘山
施重報效何階不勝悚懼之至

御批

卿學府高標士林貞幹論思之地亦既優閑彌綸之
司聊從應務別當獎擢何乃謙撫所謝知

謝知制誥狀并御批

右臣忝跡集賢久無成效幸免咎責伏用兢惶忽蒙
特恩令知制誥臣學業既淺識理非長述宣聖旨誠
恐不逮跪受嚴命伏增悚惕無任戴荷之至

御批

昔掌王言以宣國命頃來相習多事游詞卿舊在掖
垣已推才識及登書府備探微奧故有特命宜副朕
心何所謙撫誰與爲讓

謝兩弟移官就養狀并御批

右臣兩弟蒙恩移官就養老母感戴殊澤戰荷兼深
臣山藪陋材豈堪國用日月私照謬掌綸言犬馬以
地近見矜烏烏以情至蒙福曲承孝理之賜莫知報
效之所無任悚懼荷恩之至

御批

卿之忠誠本於孝行亦既許國每懷安親爰請二弟
近鄉就養申之友愛迺爲隱犯用加此請故遂雅懷
所謝知

謝中書侍郎狀并御批

右臣謬跡書府兼司綸翰思力淺近無所發明聖恩
不以不才却賜榮獎拔擢非次荷躡惟深但中書近
密參掌不易豈臣微賤所堪忝竊拜命之日伏用慙
惶不勝戰荷之至

御批

此職擇才十年虛位以卿達識所以疇庸斟酌朝經
勅關政本當茲密令宜喻朕懷以謝知

謝勅賜麥麵狀并御批

右林招隱宣勅賜臣等招隱說云薦新之外禁中所
出皆是降至尊親耕稼穡之所成也伏以周人之禮
惟有籍田漢氏之薦但聞時菓則未有如陛下嚴祗
於宗廟勤儉於生人事必躬親動合天德臣亦何幸
近奉徽音又蒙聖恩猥垂珍錫已飽於聞義况霑此
時羞綢繆溼澤未知報效死罪死罪仍望宣牒史館
以示將來臣等不勝感荷之至

御批

歲比不登朕每勤止宮中閑處粟麥兼滋常候嘉苗
以近知遠亦既成熟實用慰心所以躬率諸子是受
是刈稼穡艱難取知爲國之本宗廟致敬寔謂思於
所先既以薦新餘用分錫卿等同體固合共之所謂
宣付史館任量其宜也

謝賜食狀并御批

右臣等面奉進止令就集賢院與諸學士等觀聖注
道德經尋又賜臣等食竊味道腴兼承珍饌聞義飽
德虛往實歸臣等何人叨承渥澤不勝悚戴之至

御批

卿等入院共食何足爲謝也

謝賜藥狀并御批

右高力士宣奉恩旨賜臣等鹿角膠丸及駐年面脂
有命自天感戴兼至臣等涓滴無補渥澤日深多謝
股肱之良每慙智力之效徒承聖恩同體之義更霑
御藥駐年之錫事絕希幸禮優常遇微軀賤貌因大
造而載延捧日承天荷曲成而無極臣等無任悚戴
之至

御批

臘日所惠固其常耳信則微物亦有佳名與卿共之

何足爲謝

謝賜尺詩狀并御批

右今日高力士宣勅賜臣等御製詩并寶尺伏以尺者紀度之數宜麗天文詩者律呂之和是生節物聖恩下逮天旨旁流因物寓言以言番象臣雖瞽陋伏見宸衷竊謝良工徒秉刀尺終期死力取配鈞衡而未副所圖退省知罪臣等不勝負荷感懼之至

御批

尺之爲數陰陽象之宰臣匠物有以似之卿等謀猷非無法度因之比興以喻乃心盡力鈞衡深知雅意

謝蒙太子書頌

右昨者高力士宣恩旨垂示皇太子書紀功德頌恭覽睿跡實天人之表幼傳楷則訓叶文明春秋典學時惟多藝鸞鳳變態入神妙而難明俾臣庸者憑篆刻而不朽微臣之幸倍百常情無任悚戴之至

御批

大臣作頌以揚休聲銘之琬琰亦資翰墨太子鴻書則非二身爲國本將示于後因以命之無能發揮何所爲謝

謝兩弟授官狀并御批

右伏奉昨二十日恩命授臣第九臯殿中大監九章太子司議郎臣私門積釁歿罰如昨日月逾邁禮及外除第九臯等加以常才比服哀疚瞻望未遠縞練猶存非常之恩一朝總集慙皇哽咽罔識言次不知微命餘生何以一報天造載悲載懼五情飛越不勝感戴戰慄之至

御批

卿之昆弟並著才能去歲所論已有處分既終祥縞宜列朝衣豈謂殊私雅符公議所謝知

謝賜衣物狀 并御批

右高力士宣勅賜臣衣及器物等臣不孝苟存企及制禮天恩以忝樞近賜問再臨衣服珍器殊常寵錫臣有何力可以叨濫渥澤至深誠效已竭惟有微命不知所圖無任感戴之至

御批

籍卿政事項在繹縑今禮制以過服用茲始少許衣物何足謝焉

讓賜蕃口狀

右高力士宣聖恩賜臣等蕃口執自邊軍釋囚為隸誠宜供國次及賞功臣等無庸何以受賜殊恩俯降

循涯自失伏望俯停渥澤存以至公矜遂懇誠許歸
官寺則上有無偏之道下有無苟之責無任惓款之
至

觀御製喜雪篇陳誠狀并御批

右臣等遠見工部侍郎侍講學士陳希烈所蒙恩賜
聖製雪篇伏以聖惟無作作則應天地和陰陽斯之
謂矣言微利博旨遠恩深于彼蒼生焉知帝力臣聞
食者萬姓之命雪爲五穀之精兆且見於祈年律既
和於言志聖心昭感天瑞合符豈比夫漢詠白雲但
嗟歡樂周歌黃竹徒事巡遊而已哉臣等仰望昭回

莫知遠近幸均生植同是霑濡况臣忝在樞衡無能
翼亮聞罪已之義若寘冰谷猶忘軀之節冀益消塵
伏誦聖文無任喜懼臣等誠歡誠恐謹言

御批

復緣講讀便與希烈未得付卿今過有稱揚豈成獻
替所期戮力保合大和今付一本觀唱和之美也

謝賜御書喜雪篇狀并御批

右臣前伏見聖製喜雪篇奉狀稱慶已特蒙賜本今
日高力士又宣賜臣林甫臣某各一本麗天之文或
異傳誦垂露之聖難有偏沾則不知玄造曲成宸毫

俯逮鸞鳳斯降雲雨載均愚生何幸叨此殊賜是知君臣之深義感不一子孫之後傳寶無窮而未知此生何以上荅臣等不勝感戴伏望許臣等進食以申微誠雖厨箠每搖而野芹徒獻豈云堯禹之膳異達臣子之情幸甚幸甚謹奉狀以聞謹奏

御批

比年少雪遂罕秋成恐陰律愆期時無可望孰云禱乂每事虔誠雨雪驟盈喜慰初集率爾成作書情而已方示朝廷

讓賜宅狀并御批

右去正月二十六日中使李仁智宣口勅賜臣前件宅仍令官脩及什物一事已上自奉恩命夙夜憂惕既慙虛受載懼滿盈臣生身蓬華所居淺陋曩屬首麻豈圖弘敞宸私曲被寵賜猥臨加以殃罰之餘參議樞掖草土之末庇形棟宇器用資於官備禮數異於喪紀兢惶失圖啓處無地况涓滴未效霈澤先盈非據之責誰任其咎又臣見在家累僅十餘人臣之俸祿實為豐厚以此貿遷足辦私室今崇其甲第更使增脩或恐因緣多有費損上則虧耗國器下則招集身尤縱陛下時垂寬容而臣苟為貪冒其如物議

何其如公道何伏乞賜寢前命俯垂矜察納臣誠情
免臣罪戾其宅及什物望益却令官收無任荒懼之
至

御批

比來官宅隨事借人與卿寧居用加脩飾已有處分
不煩讓也欲令師儉雖則卿心縱使增脩其如國命
况聞制度不是宏博大臣所處亦以爲宜可擇日移
入

讓兩弟起復授官狀

右臣昨以兩弟身名狀涉隱冒家且未正焉能正人
所以陳露奏聞誠欲自律今日高力士宣勅令與兩
弟京官慈旨優柔感深骨髓微臣何有叨此殊恩但
臣自罹殃罰纒踰年序忝承重任不敢顧私而鞠育
之恩繆懷罔極几筵在遠奠酹不親惟有兩弟在家
獲申情紀今若恭承恩命盡在墨縑何心何顏可以
偷此陛下每弘教義必先名節豈於愚臣無少矜憫
若使九臯等獲免罪戾幸無削除在臣闔門已霑殊
澤更令授職俱遠哀次於臣私情實所不忍然於朝
議必有喧黷乞寢成命俯亮愚衷冀無玷大猷豈敢
自遂而已不勝哀荷戰懼之至

御批

卿移孝於忠自家刑國誠有必盡義實可嘉人之同
氣莫不相似驗卿才識弟亦可知朕意欲登賢俱在
朝列而尚居哀紀願留主祭可以理奪用允所求待
至祥縞非無後命

謝赴祥除狀

并御批

右殃釁殘生謬承天澤無能報效徒廢情禮而日月
迅速祥制有期在臣私情哀懼莫主几筵在遠追慕
不親一違外除終身何託伏望察臣罔極俯遂哀懇
假以傳乘暫赴來月道路徃復不出數旬孝理之恩

冀知死所無任悲迫戰懼之至

御批

不可復見惟餘孝思情禮所歸近遠無別卿當大任
朝夕謀猷欲遂乃懷其如重寄旣從奪禮安得顧恩
宜抑此情也

進龍池聖德頌狀

并御批

右先奉勅令臣撰文伏以天將啓聖地乃出符歷考
圖籙曠古未有臣學術膚淺且靈命難言雖已極於
愚思曾未徵於萬一猥承恩獎虛污磨礱以此慚惶
無寧啓處謹隨狀封進以聞塵黷宸嚴伏增戰越

御批

天啓元符以贊鴻業朕誠薄德曷用當之既史策是書而頌聲復起宗子固請遂及於茲卿之詞旨度越前輩曲成意義多所發揮實靈命之克彰因斯文之不朽

謝弟授官狀并御批

臣伏以聖恩非常拔臣以無能受任歲月漸久涓埃無益取招毀議有累聖明臣前面陳誠以請罪陛下不以賜責猶加過恩特以殊榮猥霑臣弟彌速曠官之謗且重非才之責累延公器寵及私門顛覆是憂隕越無措不勝悚懼荷戴之至謹奉狀陳謝以聞

御批

朕之知卿非在今日君臣之際何有間言故在增榮有以昭亮况卿令弟尚淪卑秩以公見授何謂私恩所謝知

唐丞相曲江張先生文集卷之九終

刺臨又聞

知之吹噓非此今日豈亞之烈何休聞言好亦世崇

刺臨

刺臨

刺臨

刺臨

刺臨

刺臨



